



ATASSUT INATSIARTUNI

ATASSUT

UPA 2014/158-1

Knud Kristiansen

10.04.14

Inuusuttut inersimasullu innarluutillit atuartinneqarnissaannut, ilinniagaqalernissaannut suliffeqalernissaannullu Kommuunit inatsisit atuuttut naapertorlugit sunik pisussaaffeqarnerannik Naalakkersuisut erseqqissaassuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqtigiit)

ATASSUT-miit siunnersuuteqartoq qutsavigaarput.

Nunatsinni innarluutillit inuusuttut inersimasullu immikkut atuartitsinikkut, ilinniagaqalernissamik, suliffissamilluunniit pisariaqartitsisut eqqarsaatigalugit, ATASSUT-miit oqaatigissavarput, tunngaviatigut uagut politikikkut anguniakkatsinni innutaaqatitut immikkoortillugit isiginnginnatsigit, taamaattorli pisariaqartitaasigut immikkoortuteqarsinnaammata. Tamannalu aallaavigalugu inatsisitigut atuuttunik periarfissaqartitaallutik.

Inuiaqtigiit tamatta immitsinnut isigaluta, innarluutilinnut ataatsimut isiginneraasitsinni, aammalu atuartitsinikkut, ilinniartitaanikkut, kiisalu suliffissatigut pisariaqartitsineq aallaaviusariaqarpoq, innarluutillit pisariaqartitaat aallaavigalugu. ATASSUT-miit inatsit tunngaviusoq, soorlu Inatsisartut peqqussutaat nr. 10 aallaavigalugu, atuarnrup kingorna naammassinninnermi iliuusissatut pilersaarusiortoqartarnissaa pisariaqartitsisoqarneratigut tunngavissaqareemat.

Taamaattorli ilisimavarput, kommuunit assigiinngisitaartunik periarfissaqartitsinerat, aamma kommuunip iluani, sumiiffinni, illoqarfiuppat, imaluunniit nunaqarfiuppat periarfissat assigiinngisitaarsinnaallutik. Tamannalu kommuunimi iliuusissanik tulleriarinermittoq ATASSUT-miit isumaqarpugut.



ATASSUT INATSIARTUNI

ATASSUT-miit isumaqarpugut kommuunit tamarmik innarluutilinnut kiffartuussinikkut, sullissiniarnikkullu pimoorussisut, aammalu atorfilittat ullut tamaasa ajunngitsumik sullissiniarlutik ilungersortut.

Innarluutilinnut akisussaaffiup kommuuninut nuunneqarmat 2010-mi aningaasanik malitseqartitsinerat naammaginarsimanngilaq, soorlu taamanikkut aamma tamanna ATASSUT-miit sakkortuumik uparuartorsimagipput, aamma tamannarpiaq pillugu kommuunit namminneq, kommuunillu kattuffiat KANUKOKA taamatut oqariartuuteqartoq, kommuunit akisussaaffiup tigungnerani aningaasatigut amikkisaartereerlugit tunniunneqarmat. Tamannalu aamma manna killiffimmi soorunami takussutissaqartoq ATASSUT-miit isumaqarpugut. Taamaattumik ilaatigut naapertuussorinngilarput siunnersuuteqartup kommuunit “oqaluttuuteqqummagit” suut akisussaaffigineraat. Kisiannili ATASSUT-miit nuannaarutigaarput, taamanili pisussat oqaluttuarisavut maannakkut allanit aamma uppersarsineqarlutik iliuuseqarfigerusunneqalermata. Taamaattumik pisarnitsit ATASSUT-miit pimoorullugu innarluutillit pillugit iliuuseqarnissamut suleqataassaagut, aamma kommuunit qanimut suleqatigalugit, pisariaqartinneqartullu aallaavigalugit piviusorsioortumik iliuuseqarnissaq qularnaaqqullugu.

ATASSUT-miit Naalakkersuisut akissutaat tigulluarpagut, aamma suliniutaareersut, suliniutaasussallu ilaatigut siunnersuummut uunga attuumassuteqarluartut pillugit.

Taamatut oqaaseqarluta, Naalakkersuisut akissutaat tigulluurlugu, Naalakkersuisut KANUKOKA-llu suleqatigiillutik Innarluutilinnik isumaginninnerup kommuuninut nuunneqarnerata kingorna nalilersuinerit pisussat qilanaaralugit, taakku kingorna iliuusissat tunngaviussammata, manna siunnersuut ATASSUT-miit tapersinngilarput, suliniutit tigussaasut aallartereermata.